

CODER

- La glesie dai Sants Filip e Jacum (*casele n°18*)
- Ancone Nord (*casele n°49*)
- Ancone Sud (*casele n°31*)
- La cuccagne (*casele n°9*)

LA GLESIE DEI SANTS FILIP E JACUM

La place di Coder e veve une volte une muse diferente di chê di vuê dal moment che il suei al ocupave il spazi denant de glesie parochiâl dai sants Filip e Jacum.

L'an de prime consacrazion de glesie al è il 1404; tal 1603 e veve tor ator un piçul simitieri, là che si jentrave traviers di cancei di fier. Al jere un piçul cjampanili cun dôs cjampanis e la crôs di fier; la glesie e jere lungje undis pas e largje cuatri pas e mieç.

Tal 1664 il plevan di Sedean Daniele Marigo, nassût a Coder, al tornà a vivi in paîs e al tacà a fâ sù il cjampanili di vuê. Ai 2 di Jugn dal 1664, si decidè di fâ un alç bon di tignî sù dôs cjampanis sore de nicje dal batisteri di flank de glesie. Tal Dicembar dal stes an il lavôr al jere za insom: il cjampanili al finive cun cuatri barcons cuvierts di cops e nol jere plui alt di là che a son cumò lis cjampanis, parcè che e bastave chê altece, a pet de grandece de glesie.

A mieç dal XVIII secul e fo fate sù la glesie parochiâl di cumò e la cele cun cuatri barcons doplis pes cjampanis; la spice dal cjampanili si le zontà tal 1787; il suei al fo cuvierzût pôc prin de prime vuere mondiâ.

ANCONE NORD

Vie pe seconde metât dal 1800 e vignì fûr une circolâr che e proibive lis statuis di len tes glesiis par pôre dai fûcs.

Chê de Madone e restà par cualchi an tal stanzin de glesie.

Tal 1908 i coscrits oms a deciderin di metile tune ancone che pe ocasion e fo ristrutturade di un costrutôr di cjampanilis di Coder cognossût tant che "Bepi Cjampanîl" (pari dal prof. Giuseppe Di Lenarda).

ANCONE SUD

Une siore di Coder, e veve non Maria Tel (Mariutate), i fasè un cuadri ae Madone par vie che no rivave a vê fruts.

Po e ve cuatri fis.

La int di Coder e pensà che si tratàs di un miracul e e metè chel cuadri intune ancone.

CUCAGNE

A Coder, la ultime di Avost, i zovins dal paîs a organizin il zûc de cucagne. A alcin sù un pâl alt sù par jù 9 metris e adalt a picjin cualchi premi.

Te stesse domenie si fâs ancje la procession e ducj i zovins a van a puartâ la statue de Madone pes viis dal paîs.

Finide la liturgjie dute la int e va sot dal pâl par spietâ i zovins che a son daûr a cambiâsi. Cuant che a rivin ducj ur batin lis mans, sei pai vistîts che a àn sù, sei pal traspuart, ogni an plui originâl.

I fantats a tachin a ingrumâsi sot dal pâl tacant di chei plui ben metûts fin a rivâ in ponte cun chel plui sclagn. Cuntun pôc di sacrifici a rivin a cjapâ ducj i premis. La int e bat lis mans e i fantats a fasin fieste fin a straoris.